



Submisaun husi La'o Hamutuk

ba

Timor-Leste Extractive Industries Transparency Initiative (TL-EITI)

kona-ba

Relatóriu Rekonsiliaun EITI Timor-Leste 2023

Dili, 21 Agostu 2026

INTRODUSAUN	2
Desagregasaun Dadus no Divulgasaun Propriedade Benefisiária	2
PREOKUPASAUN ESTRATÉJIKU NO LAKUNA GOVERNASAUN.....	3
Sustentabilidade Fundu Petrolíferu no Dependénsia Ekonomia	3
Transparénsia Propriedade Benefisiária Sei La Kompletu	3
Obrigatóriu hodi relata Asidente ne'ebé Akontese.....	3
Integridade Empreza Estatál no Anti-Korrupsaun.....	4
Partisipasaun Sosiedade Sivil ne'ebé Sei Limitadu	4
Ambiente, Klima no Justisa Interjerasional.....	4
Mudansa Klimatika no Responsabilidade	5
Rekonsiliaun no Kualidade Dadus	5
Despeza Sosiál liu Husi Konteúdu Lokal	5
Risku Prinsipál Ba Governasaun Rekursu Naturál.....	5
REKOMENDASAUN ESTRATÉJIKU BA EITI TIMOR-LESTE NO MSWG.....	6
Transforma Transparénsia Sai Akuntabilidade Públika	6
Kria no Hametin Mekanizmu Kontrolu Públiku.....	6
Uza EITI Atu Promove Diversifikasaun Ekonomia	6
Integra Tranzisaun Enérjetika no Responsabilidade Ambientál.....	7
Hametin Partisipasaun Sosiedade Sivil, Feto no Komunidade Afetadu	7
KONKLUZAUN	7

INTRODUSAUN

La'o Hamutuk apresia no rekoñese esforsu husi Multi-Stakeholder Working Group (MSWG), Sekretáriadu EITI no Independent Administrator iha preparasaun no publikasaun Relatóriu EITI 2023. Relatóriu ida ne'e hatudu melloramentu importante iha kobertura no profundidade divulgasaun, no tenke konsidera hanesan baze ida atu kontinua hametin mekanizmu transparénsia iha futuru. Maske La'o Hamutuk prefere liu atu Sekretáriadu oferece relatóriu versaun Tetum ba públiku.

Rekursu minerál no petrolíferu iha Timor-Leste nudár patrimóniu públiku ne'ebé iha valór koletivu ba sidadaun sira, la'ós de'it ba jerasaun ohin loron maibé mós ba jerasaun sira ne'ebé sei mai. Tanba ne'e, governasaun rekursu naturál no naun-renovável presiza haree la'ós de'it husi perspetiva reseita no investimentu maibé tenke konsidera mós direitu umanu, protesau ambientál, justisa sosiál, sustentabilidade fiskál no responsabilidade interjerasionál.

La'o Hamutuk rekoñese katak Relatóriu EITI 2023 representa progresu importante iha transparénsia no divulgasaun kona-ba setór estrativa. Relatóriu ida ne'e loke divulgasaun dados, inklui desagregasaun iha nivel entidade, tipu rendimentu no projetu; aumenta kobertura ba subkontratór sira; inklui informasaun kona-ba propriedade benefisiária, integridade, ambiente, mudansa klimatika no tranzisaun enerjética; no fornese asesu ba dokumentu kontratuál relevante sira.

Maibé, La'o Hamutuk subliña katak transparénsia la bele too de'it iha publikasaun dados. Transparénsia iha valór públiku bainhira sidadaun sira bele asesu, komprende, verifika no uza informasaun atu husu responsabilidade ba Governu, empresa no instituisaun públika sira. Ida ne'e mós konsistente ho objetivu EITI atu uza divulgasaun hodi hametin governasaun di'ak, akuntabilidade no debate públiku.

Tanba ne'e, La'o Hamutuk konsidera katak progresu iha Relatóriu EITI 2023 tenke akompaña ho asaun institucionál ne'ebé konkretu, bele sukat no transparente atu responde ba lakuna sira ne'ebé sei iha, liu-liu kona-ba propriedade benefisiária, integridade no anti-korrupsaun, qualidade dados, partisipasaun sosiedade sivil, sustentabilidade Fundu Petrolíferu, igualdade jéneru, no impaktu sosiál, ambientál no klimatiku husi atividade estrativa.

Submisaun ida ne'e bazeia ba leitura krítika kona-ba Relatóriu EITI 2023, EITI Standard 2023, rezultadu validasaun Timor-Leste, desizaun no rekomendasaun EITI Board, no prinsípiu governasaun rekursu naturál ne'ebé promove transparénsia, akuntabilidade, partisipasaun públika, sustentabilidade no justisa interjerasionál.

Desagregasaun Dados no Divulgasaun Propriedade Benefisiária

Relatóriu apresenta dados ho nivel detallu ne'ebé permite haree diferença entre entidade, tipu rendimentu no nivel projetu. Desagregasaun ida ne'e importante tanba permite públiku kompara pagamentu husi empresa ho reseita ne'ebé Governu simu no haree ho klaru kontribuisaun setór estrativa ba finansa públika. Estratéjia ida ne'e konsistente ho EITI Standard 2023, ne'ebé promove divulgasaun dados ho nivel detallu ne'ebé permite utilizadór sira komprende no analiza jestaun rekursu naturál.

Relatóriu ne'e mós fornese asesu ba testu PSC sira ne'ebé ativu, inklui aneksu no emenda. Transparénsia kontratuál importante tanba kontratu sira define direitu, obrigaun, risku, pagamentu no benefíciu entre Estadu no empresa. Maske nune'e ami nota katak relatóriu informasaun kona-ba propriedade benefisiária ho limiar 10% no identifika entidade sira ne'ebé la fó informasaun completa. Ne'e taka dalan ba públiku atu hatene sé mak ikus liu iha propriedade ka kontrola empresa sira ne'ebé opera ho rekursu naturál públiku.

Ba La'o Hamutuk, publikasaun kontratu la'ós de'it asuntu tékniku maibé nudár kondisaun fundamentál atu sidadaun sira bele avalia se akordu kona-ba rekursu públiku respeita interese nasional, no se parte hotu kumpre obrigasaun sira ne'ebé konkorda ona. Standard EITI 2023 mós prevee divulgasaun kona-ba kontratu, lisensa, aneksu no alterasaun relevante.

PREOKUPASAUN ESTRATÉJIKU NO LAKUNA GOVERNASAUN

Maski iha progresu, La'o Hamutuk konsidera katak Relatóriu EITI 2023 sei husu asaun adisionál atu garante katak transparénsia sai instrumentu efetivu ba akuntabilidade pública, reforma institusionál no governasaun sustentável.

Sustentabilidade Fundu Petrolíferu no Dependénsia Ekonomia

Relatóriu EITI 2023 hatudu realidade ida ne'ebé presiza hetan konsiderasaun política urgente. Iha 2023, Fundu Petrolíferu simu tokon \$427 iha reseita petrolífera, hetan retornu investimentu biliaun \$1.679 no Governu halo levantamento biliaun \$1.090. Saldu Fundu iha 2023 nian rohan hamutuk biliaun \$18.288. Relatóriu mós hatudu katak Bayu-Undan, nu'udar fonte prinsipál husi reseita petrolífera, tama ona iha faze final, ho produsaun ne'ebé tun no parte boot husi rikeza kampu ne'e nian prodús ona.

Sustentabilidade Fundu Petrolíferu la bele trata hanesan asuntu finanseiru de'it maibé tenke trata hanesan asuntu kona-ba direitu no responsabilidade interjerasional. Fundu Petrolíferu estabesele atu jere reseita petrolífera ho objetivu proteje patrimoniu ba jerasaun sira; tanba ne'e, sustentabilidade tenke konsidera ho perspetiva longu-prazu. Lei Fundu Petrolíferu rasik estabesele prinsipiu no regra kona-ba jestaun no transferénsia Fundu ba Orsamentu Estadu.

La'o Hamutuk konsidera katak prosesu EITI tenke uza dados sira ne'e atu promove debate públiku kona-ba sustentabilidade fiskál, padraun levantamento, risku dependénsia no nesesidade urgente atu diversifika ekonomia, la'ós de'it atu responde rekezitu standard EITI 2023.

Transparénsia Propriedade Benefisiária Sei La Kompletu

Relatóriu hatudu katak entidade 51 fó informasaun kona-ba propriedade beneficiáriu (*beneficial ownership ka BO*), maibé entidade 10 la fó informasaun kompletu, inklui kontratante rua ne'ebé la responde no subkontratante ualu. Situasaun ida ne'e hatudu katak transparénsia BO sei la kompletu. EITI nian informasaun nasional mós hatudu katak maske Timor-Leste seidak iha rejime legál ne'ebé obriga divulgasaun pública kona-ba beneficial ownership no seidak iha rejistu públiku BO komprehensivu maibé standar EITI 2023 iha obrigasaun tenke apresenta BO.

Lakuna ida ne'e presiza haree hanesan risku governasaun, la'ós de'it problema administrativu. Bainhira públiku la bele hatene se mak ikus liu iha propriedade ka kontrola empresa sira ne'ebé simu direitu atu esplora rekursu públiku, kapasidade públiku atu identifika konfliktu interese, risku korrupsaun no relasaun entre interese públiku no interese privadu sei limitadu.

Bainhira TL kria Lei EITI (ami konkorda ho rekomendasaun sira iha tabela 13.1), bele inklui ba kompañia sira ne'ebé la fó informasaun loos no kompletu.

Obrigatóriu hodi relata Asidente ne'ebé Akontese

Atividade iha indústria estrativa no mineiru sempre iha risku no konsekuénsia, nune'e La'o Hamutuk hanoin MSWG bele aproveita momentum no envolvimentu hosi parte interesada sira hodi dudu obrigasaun ida ba empresa estrativa hotu-hotu atu labele subar ka taka asidente sira ne'ebé akontese durante sira-nia operasaun. Ezemplu konkretu, Kompañia Timor Resources hetan asidente *well kick*

iha Covalima 2021. Maibé, to'o ohin loron, seidauk iha relatóriu ida ne'ebé klaru no asesivel ba públiku kona-ba akontesimentu refere.

Asidente hotu-hotu, liuliu sira ne'ebé iha potenciál atu fó impaktu ba traballadór sira, comunidade sira, no ambiente, tenke relata ho transparente no iha tempu ne'ebé loos, atu nune'e públiku no parte interesada sira bele hatene, monitoriza, no avalia pasu sira ne'ebé empreza sira foti atu prevene insidente sira ne'ebé hanesan.

Integridade Empreza Estatál no Anti-Korrupsaun

Relatóriu 2023 husu entidade sira atu submete informasaun relevante kona-ba política anti-korrupsaun, maibé entidade balun la responde, inklui TIMOR GAP, E.P.

La'o Hamutuk konsidera lakuna ida ne'e ho seriedade liu-liu tanba Empreza Estatál ne'ebé opera iha setór estratéjiku tenke hatudu padraun aas iha transparénsia, integridade, governasaun korporativa no akontabilidade. EITI Standard 2023 ezije no iha obrigasaun ba divulgasaun kona-ba partisipasaun Estado no Empreza estatál, inklui relasaun finanseira ho Governu, governasaun korporativa no informasaun finanseira relevante; mós iha espetativa atu empreza estatál publika política anti-korrupsaun.

Relatóriu mós hatudu katak TIMOR GAP depende maka'as ba apoiu finanseiru Governu atu finansia operasaun no projetu sira, inklui grant tokon \$54 iha 2023. Tanba ne'e, transparénsia kona-ba transferénsia públika, uza Fundu, kontratasaun, aprovizionamentu, subkontratasaun no governasaun korporativa presiza sai parte importante husi kontrolu públiku. Relasiona ho kustu empréstimu husi TIMOR GAP sobre *financial liabilities* iha diferensia montante, relatóriu EITI hatudu tokon \$800,425,983 iha 2023 no relata husi Fundu Petroleu hatudu deit tokon \$596,795,136. Alende ne'e mos presiza iha konsisténsia ba númeru no Sekretáriu EITI iha papél importante ida atu asegura publikasaun sira asesivel ba públiku hanesan dokumentu sira relasiona ToR, EIS, EMP, no dokumentu sira seluk relasiona ho atividade mina-rai, gas no mineira no ami rekomenda atu Sekretáriu EITI halo mós publikasaun iha nia pájina website.

Aleinde ne'e, ami hanoin mós atu tabela sira hodi hatudu PSC, di'ak atu inklui hotu kampu sira nia naran nune'e mós inklui presu mina-rai no gas presiza aplika presu ida konstante hodi asegura komparaun dadus ne'ebé konsistente tuir tempu. Nune'e mós presiza klarifikasaun kona-ba investimentu sira ne'ebé lakon atu evita interpretasaun sira ka tendénsia pozitivu sira ne'ebé la refleto kondisaun loloos

Partisipasaun Sosiedade Sivil ne'ebé Sei Limitadu

Iha Validasaun anteriór, Timor-Leste hetan pontuasaun global 58 iha implementasaun EITI Standard 2019, no pontuasaun Outcomes and Impact 30.5. EITI Board subliña nesesidade atu liga divulgasaun EITI ho política nasional, outreach no debate públiku, la'ós publika relatóriu de'it.

La'o Hamutuk rekoñese limitasaun internu ne'ebé afeta partisipasaun sosiedade sivil. Maibé, ida ne'e la bele sai razaun atu limita espasu ba kritika independente. EITI nian valór depende mós ba kapasidade CSO atu partisipa ho liberdade, kritika no independénsia, inklui bainhira kritika sira la konfortável ba instituisaun públika ka empreza.

Ambiente, Klima no Justisa Interjerasional

Relatóriu inklui dadus kona-ba emisaun gas estufa no impaktu ambientál, maibé La'o Hamutuk konsidera katak transparénsia iha área ida ne'e presiza desenvolve liu tan.

Atividade estrativa bele afeta direita ba ambiente saudável, rekursu bee, rai, biodiversidade, saúde pública, moris no subsistênsia comunidade lokál. Tanba ne'e, divulgasaun tenke inklui, bainhira relevante, dados kona-ba impaktu ambientál, gastu ambientál, obrigaun rehabilitasaun, responsabilidade pós-operasaun, planu desmantelamentu no mekanizmu garantia finanseira. Maske relatóriu ne'e relata Timor-Leste nia kontribuisaun ba emisaun atinje 0,0003%, maibe numeru emisaun ida ne'e seidauk inklui emisaun *Scope 3*.

Perspetiva ida ne'e mós importante ba justisa interjerasional, tanba kustu ambientál no sosiál husi atividade estrativa bele dura naruk liu husi períodu produsaun no bele husik responsabilidade ba jerasaun sira ne'ebé la partisipa iha desizaun kona-ba esploraun no produsaun estrativa.

Mudansa Klimatika no Responsabilidade

Kauza boot husi mudansa klimátika kontribuisaun boot mai husi Industria estrativa no mineiru inklui konsumsaun Kombustivel fosil. La'o Hamutuk fiar katak MSWG bele diskute kona-ba asuntu ida ne'e, oinsá empreza estrativa no mineiru sira presiza atu hala'o sira nia responsabilidade ba adaptasaun no mitigasaun ba mudansa klimátika. Obrigaun sira-ne'e labele limita de'it ba operasaun empreza nian, maibé tenke abranje mós protesasaun no prezervasaun rekursu bee nian, rehabilitasaun ambientál, redusaun risku poluisaun nian, no pasu konkretu sira hodi mitiga impaktu sira hosi atividade estrativa sira ba comunidade sira no ambiente.

Rekonsiliaun no Kualidade Dados

Relatóriu 2023 hatudu katak husi totál reseita tokon \$149.95, tokon \$141.00, ka 97,56%, bele rekonsilia. Montante tokon 3.21 ka 2,23%, relasiona ho entidade sira ne'ebé la responde; tokon \$0,19 ka 0,13%, mak diferença ne'ebé seidauk rezolve; no tokon 0,12 la tama iha prosesu rekonsiliaun.

La'o Hamutuk konsidera taxa rekonsiliaun ida ne'e hanesan progresu importante. Maibé, relatóriu kredível tenke esplika ho klaru natureza, fonte, montante no razaun ba lakuna sira ne'e, no mós hatudu medida konkretu atu rezolve ka redús iha relatóriu futuro. Objetivu la'ós de'it atu atinje número rekonsiliaun aas, maibé atu garante katak públiku bele komprende limitasaun dados no avalia ho realistiku grau konfiansa iha informasaun ne'ebé publika.

Despeza Sosiál liu Husi Konteúdu Lokal

Kona-ba ida-ne'e, ami mós fiar katak MSWG presiza hala'o diskusaun kle'an liután kona-ba política no implementasaun konteúdu lokál. Ami hanoin katak la'ós de'it oinsá mak empreza ida kontribui ba estadu, maibé mós benefísiu direta/real hira mak comunidade lokál sira hetan hosi atividade indústria estrativa sira refere. Porezemplu, projetu Bayu-Undan nia despeza ba Konteúdu Lokal Tokon \$29,3 maibé iha de'it por volta 2% hosi investimentu ka kontribuisaun ne'ebé dirije direktamente ba comunidade. Nune'e ami preokupa sera ke mekanizmu konteúdu lokál no benefísiu sira ba comunidade lokál sira efetivu ho suficiente.

Risku Prinsipál Ba Governasaun Rekursu Naturál

La'o Hamutuk konsidera katak risku prinsipál ba EITI la'ós kritika husi sosiedade sivil. Risku boot liu mak bainhira mekanizmu transparénsia sai prosesu burokrátiku ne'ebé prodús relatóriu, maibé la konsege transforma dados sai instrumentu ba akuntabilidade, debate públiku no mudansa iha política.

Iha perspetiva governasaun, risku fiskál relasiona ho possibilidade ba Fundu Petrolíferu mamuk no continuidade dependénsia ba reseita husi rekursu naun renovável. Risku korrupsaun relasiona ho falta transparénsia kona-ba propriedade, kontratu, relasaun entre empreza no Estadu, no jestaun empreza estatál. Risku reputasaun institusional mosu bainhira EITI konsidera hanesan mekanizmu

publikasaun dados de'it, la'ós plataforma atu haforsa reforma. Risku sosiál no ambientál mosu bainhira comunidade afetadu la hetan informasaun no espasu atu partisipa, no bainhira kustu ambientál la konsidera ho adekua. Risku partisipasaun mosu bainhira CSO sira partisipa formalmente maibé la iha oportunidade real atu influensia debate no desizaun.

Tanba ne'e, La'o Hamutuk rekomenda katak MSWG no Sekretáriu EITI uza estratéjia *risk-based* no *outcome-oriented*, hodi liga transparénsia ho resposta institusionál. Ida ne'e konsistente ho EITI Standard 2023, ne'ebé konsidera MSWG nu'udar mekanizmu importante atu garante katak implementasaun EITI responde ba dezafiu governasaun setór estrativa ne'ebé signifikativu iha kontektu nasional.

REKOMENDASAUN ESTRATÉJIKU BA EITI TIMOR-LESTE NO MSWG

Transforma Transparénsia Sai Akuntabilidade Pública

EITI Timor-Leste no MSWG prezisa kontinua iha esforsu liu tan publikasaun dados, hodi uza informasaun EITI atu promove debate públiku, fiskalizaun no mudansa política. Dados sira tenke apresenta iha formatu ne'ebé asesivel, komprensivel no bele uza husi jornalista, pesquizadór, parlamentár, CSO, estudante no sidadaun sira.

Entidade sira ne'ebé la responde ba prosesu rekonsiliaun tenke hetan akompañamentu no mekanizmu responsabilizaun ne'ebé klaru. Bainhira dados la bele rekonsilia, relatóriu tenke esplika ho transparénsia razau, montante, entidade envolvida no medida atu rezolve lakuna.

MSWG mós tenke kontinua promove divulgaun sistemátika no iha fonte orijinal, atu relatóriu EITI bele uza hodi agrega, analiza no esplika dados, envezde sai fonte úniku ba informasaun pública. EITI Standard 2023 konsidera sistematic disclosure hanesan espetativa prinsipál ba transparénsia moderna.

Kria no Hametin Mekanizmu Kontrolu Públiku

MSWG tenke promove koordinasaun formál ho instituisaun relevante sira atu avansa ba sistema propriedade benefisiária ne'ebé viavel, atualizadu no asesivel ba públiku, tuir lei no ho salvaguarda apropiada ba dados ne'ebé legálmente sensivel.

Entidade sira hotu, liu-liu empreza estatál no entidade ne'ebé simu rekursu públiku, tenke publika informasaun kona-ba governasaun korporativa, política anti-korrupsaun, konfliktu interese, mekanizmu denúnsia no mekanizmu responsabilizaun, tuir rekeztu no espetativa relevante iha EITI Standard 2023.

EITI Timor-Leste mós tenke konsidera estabeleimentu mekanizmu klaru ba sidadaun no CSO atu husu informasaun, relata problema no halo segmentu ba rekomendasaun EITI. Mekanizmu ida ne'e tenke kompleta, la'ós substitui, mekanizmu legál sira ne'ebé eziste.

TL tenke aprova Lei EITI (p. 198) no Sekretáriu no MSWG bele prepara proposta lei.

Uza EITI Atu Promove Diversifikasaun Ekonomia

MSWG no EITI Timor-Leste tenke kontinua atu uza prosesu EITI atu promove debate públiku bazeia ba evidénsia kona-ba sustentabilidade Fundu Petrolíferu, risku fiskál no nesesidade atu diversifika ekonomia.

La'o Hamutuk rekomenda mós atu EITI promove análise kona-ba kontribuisaun real husi setór estrativa ba ekonomia nasional, inklui kontribuisaun ba PIB, reseita pública, empregu, importaun, transferénsia, kustu sosiál, impaktu ambientál no sustentabilidade fiskál. Ida ne'e sei ajuda públiku atu

avalia la'ós de'it reseita mak Governu simu, maibé mós saida mak nasaun no comunidade sira tenke selu iha forma kustu sosiál no ambientál.

Integra Tranzisaun Enerjética no Responsabilidade Ambientál

EITI Timor-Leste tenke kontinua divulgasaun luan liu tan kona-ba emisaun gas estufa, gastu ambientál, obrigasaun rehabilitasaun, impaktu sosiál no risku tranzisaun enerjética.

MSWG tenke promove divulgasaun kona-ba planu desmantelamentu, estimativa kustu, responsabilidade pós-operasaun, mekanizmu garantia finanseira no planu rehabilitasaun ambientál bainhira relevante ba projetu estrativa.

EITI Timor-Leste mós presiza promove debate kona-ba impaktu tranzisaun enerjética ba Timor-Leste, inklui risku ba reseita petrolífera, kustu no oportunidade husi enerjia renovável, nesiedade diversifikasaun no preparasaun ba comunidade no traballadór sira ne'ebé bele afetadu husi mudansa estrutura ekonomia. EITI Standard 2023 eziye divulgasaun kona-ba política no planu tranzisaun enerjética relevante ba setór estrativa.

Hametin Partisipasaun Sociedade Sivil, Feto no Komunidade Afetadu

MSWG tenke garante katak partisipasaun sociedade sivil sai livre, independente, ativa no efetiva. CSO sira tenke iha espasu atu participa, kritika, husu evidénsia, propoin alternativa no influencia prosesu desizaun. Partisipasaun ida ne'e la'ós obstákulu ba implementasaun EITI maibé nudár kritika independente sei sai parte husi mekanizmu checks and balances ne'ebé ajuda hametin konfiansa públika.

MSWG tenke konsidera rekursu no orsamentu adekuaudu ba kapasitasaun CSO, konsultasaun públika no disseminasaun informasaun. Envolvimentu comunidade sira ne'ebé diretamente afetadu husi atividade estrativa tenke sai parte importante husi prosesu, liu-liu kona-ba impaktu sosiál, ambientál, empregu, rai, bee no subsisténsia.

Iha área igualdade jéneru, EITI Timor-Leste tenke hametin divulgasaun dados empregu desagregadu tuir jéneru, pozisaun, remunerasaun no estatutu empregu, tuir limite legál no prinsipiu protesau dadus. Ida ne'e sei permite públiku avalia se dezvoltamentu setór estrativa prodús oportunidade ne'ebé justu no inkluzivu.

Ikus liu, atu rekomendasaun sira ne'e la remata hanesan deklarasaun política, La'o Hamutuk rekomenda katak MSWG no Sekretáriadu EITI estabelese mekanizmu segementu públiku ba implementasaun rekomendasaun sira. Mekanizmu ida ne'e bele inklui entidade responsavel, prazu, indikadór progresu, fonte evidénsia no estatutu implementasaun.

La'o Hamutuk konsidera katak relatóriu EITI iha futuru tenke hatudu ho klaru saida mak rekomendasaun sira husi relatóriu anteriór ne'ebé implementa ona, saida mak sei pendente hela, tanba saida, no medida saida mak konkretu atu rezolve.

Estratéjia ida ne'e sei ajuda transforma EITI husi prosesu repetitivu ba sistema aprendizajen institusionál ne'ebé bele hatudu progresu ka retrocesu iha governasaun setór estrativa.

KONKLUZAUN

La'o Hamutuk rekoñese Relatóriu Rekonsiliaun EITI Timor-Leste 2023 nu'udar progresu importante iha transparénsia no divulgasaun kona-ba setór estrativa. Relatóriu ne'e hatudu esforsu atu hametin divulgasaun, responde ba parte husi lakuna identifikadu iha validasaun anteriór no asesu públiku luan liu tan ba informasaun kona-ba rekursu natural. Maibé, progresu ida ne'e tenke sai pontu partida, la'ós pontu final.

Lakuna iha propriedade benefisiária, integridade, anti-korrupsaun, qualidade dados, partisipasaun sociedade sivil, igualdade jéneru, transparénsia, informasaun ambientál no sustentabilidade Fundu Petrolíferu prezisa resposta institusionál ne'ebé konkretu, mensurável no transparente.

Liu-liu, Timor-Leste prezisa rekoñese katak patrimóniu petrolíferu iha ita nian nasaun nudár rekursu naun renovavel no kapasidade atu kontinua hetan reseita husi setór ne'e sei diminui. Relatóriu EITI 2023 rasik hatudu reseita petrolífera tokon \$426 iha 2023 no realidade katak Bayu-Undan (no maioria husi estrasaun iha 2022), nu'udar fonte prinsipál husi reseita petrolífera, tama ona iha faze finál. Tanba ne'e, debate kona-ba transparénsia estrativa tenke desenvolve ba debate ne'ebé luan liu tan:

Oinsá Timor-Leste bele uza rikeza naturál naun renovável atu harii ekonomia ne'ebé diversifikadu, produtivu, inkluzivu no sustentável, hodi la husik dívida, dezigualdade, degradasaun ambientál no dependénsia ba jersaun sira iha futuru?

La'o Hamutuk reafirma nian kompromisu atu kontinua monitoriza setór estrativa, halo análise independente, fahe informasaun ba públiku no partisipa iha diálogu konstrutivu ho Governu, indústria, EITI no organizaun sociedade sivil sira.

Ami fiar katak kritika konstrutiva la'ós ameasa ba governasaun maibé kritika independente, informasaun pública no partisipasaun sidadaun nudár elementu importante husi demokrasia no mekanizmu atu hametin instituisaun pública, prevene abuzu no promove interese públiku.

La'o Hamutuk espera katak rekomendasaun sira iha submisaun ida ne'e sei konsidera ho seriedade husi MSWG no Sekretáriadu EITI Timor-Leste, no sei kontribui ba implementasaun EITI ne'ebé transparente, independente, inkluzivu, responsivu no orientadu ba rezultadu konkretu.

Obrigadu barak ba Ita-boot sira hotu nia atensaun no konsiderasaun tomak.

Ami be saran lia:



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia